



**UDRUŽENJE GRAĐANA SPORTSKIH
RIBOLOVACA «BISTRO» ZENICA
ZENICA**

BULEVAR KULINA BANA 32. , 72 000 ZENICA
tel/fax +387 32 242 212, e-mail bistroze@yahoo.com

TRANSAKCIJSKI RAČUN: 3389002200293108 UNI CREDIT BANK

P R A V I L N I K

**O KORIŠTENJU RIBLJEG FONDA NA RIBOLOVNOJ ZONI
OPĆINE ZENICA**

ZENICA, OKTOBAR 2010.

Na osnovu Zakona o slatkovodnom ribarstvu („Službene novine Federacije BiH“ broj 64. od 20.11.2004. godine), te Statuta UGSR „Bistro“ Zenica, Upravni odbor na svojoj sjednici održanoj dana _____ godine donosi:

PRAVILNIK

O KORIŠTENJU RIBLJEG FONDA NA RIBOLOVNOJ ZONI OPĆINE ZENICA

I-OPĆE ODREDBE

Član 1.

Ovim pravilnikom reguliše se bavljenje sportskim ribolovom na području općine Zenica na kojem ribolovno pravo koristi Udruženje Građana Sportskih Ribolovaca „Bistro“ Zenica (u daljem tekstu:UGSR „Bistro“ Zenica).

Član 2.

Slatkovodno ribarstvo u smislu ovog pravilnika je djelatnost koja obuhvata:

- proizvodnju;
- uzgoj;
- ulov;
- čuvanje;
- zaštitu riba, riblje ikre, rakova i drugih biljnih jedinki (u daljem tekstu: riblji fond) u ribolovnim vodama (rijeke, potoci, jezera, kanali i sl.).

Član 3.

Riblji fond u svim ribolovnim vodama je prema odredbama Zakona o slatkovodnom ribarstvu državna svojina.

Član 4.

Riblji fond služi kao osnova za razvijanje sportskog ribolova, za rekreaciju i za razvijanje ribolovnog turizma.

Član 5.

Korištenje ribljeg fonda se vrši na osnovu Ribarske osnove koju u skladu sa Zakonom o slatkovodnom ribarstvu izrađuju pravna lica koja su registrovana za stručna i naučna istraživanja iz područja slatkovodnog ribarstva ili ekologije kopnenih voda.

Član 6.

UGSR „Bistro“ Zenica je dužno da u skladu sa Ribarskom osnovom do kraja tekuće godine za narednu godinu donese Godišnji program unapređenja ribarstva.

Član 7.

Godišnji program iz člana 6. ovog Pravilnika mora da sadrži sve elemente iz člana 10. Zakona o slatkovodnom ribarstvu.

Član 8.

Godišnji ulov riba i drugih životinja može se vršiti samo u obimu koji predstavlja godišnji prirodni i vještački prirast. Udruženje sportskih ribolovaca «Bistro» Zenica dužno je da donese Godišnji plan ulova i izlova ribe na području kojim upravlja do kraja tekuće za narednu godinu.

II-NAČIN KORIŠTENJA RIBLJEG FONDA

Član 9.

Korištenje ribljevog fonda na ribolovnim vodama na kojima pravo korištenja ribljevog fonda ima UGSR «Bistro» Zenica vrši se u skladu sa odredbama Zakona o slatkovodnom ribarstvu.

Član 10.

Ribolovne vode na kojima UGSR «Bistro» Zenica ima pravo korištenja ribljevog fonda po odredbama ovog Pravilnika su vode na području Općine Zenica.

Na svim vodama na području općine Zenica može se vršiti sportski ribolov, računajući i izlov rakova i drugih jedinki u ribolovnim vodama, ukoliko nisu propisima nadležnih kantonalnih organa pojedine vode ili njihovi dijelovi izdvojeni kao privremene ili stalne zabrane ribolova.

Član 11.

Sve vode na području općine Zenica dijele se na salmonidno i ciprinidno područje. Granice ribolovnih voda datih na upravljanje su:

Salmonidno područje su rijeke i potoci koji se ulijevaju u rijeku Bosnu i to: Babinska rijeka od izvora do ušća u rijeku Bosnu sa pritokama: Selački potok, Markovački potok i Sebujska rijeka, Gračanički potok, Kočeva, Vrandučki potok, Orahovička rijeka, Bistričak sa pritokama (Ogruina, Šerička rijeka, Volin potok), Nemilska rijeka i Pepelarska rijeka od izvora do ušća u Bosnu.

Ciprinidno područje obuhvata rijeku Bosnu od ušća potoka Dudine u rijeku Bosnu (tromeda naseljenih mjesta Dolipolje, D. Lučani i G. Jehovina) nizvodno do mosta u Begovom hanu. Rijeka Lašva od restorana «Olimpik» do ušća u rijeku Bosnu.

Član 12.

Riblje plodište je UGSR «Bistro» Zenica dužno obilježiti vidnim tablama i znakovima na graničnim tačkama sa naznakom zabranjenih radnji shodno Zakonu o slatkovodnom ribarstvu.

Na ribljim plodištima zabranjen je ribolov i UGSR «Bistro» Zenica na tim područjima će pojačati kontrolu i čuvanje plodišta. Isto tako Udruženje će obilježiti sa vidnim

tablama granice ribolovnih voda datih na upravljanje na način koji propiše federalni ministar poljoprivrede, vodoprivrede i šumarstva.

Član 13.

Za vrijeme mrijesta riba u ribljem plodištu UGSR «Bistro» Zenica će obezbijediti stalnu ribočuvarsku službu i zabraniti ulov ribe koja je na mrijestu.

Član 14.

Pojedine ribolovne vode ili dijelovi tih voda koje su naručito pogodne za mrijest riba UGSR «Bistro» Zenica je dužno da odredi kao riblje područje (plodište). Riblji fond u ribljim plodištima može se koristiti samo za mrijest riba i za prijenos u druge ribolovne vode.

Član 15.

Na salmonidnom području za ribolov se može koristiti samo jedan štap sa najviše jednim umjetnim mamcem (mušica ili varalica) bez utega. Na ciprinidnom području se mogu koristiti najviše dva štapa sa po dvije udice i jedan ribolovni štap sa plovkom i jednom udicom. Odredba iz stava 1. ovog člana ne odnosi se na umjetni mamac varalicu. U cilju zaštite ribljeg fonda zabranjen je svaki ribolov noću.

Član 16.

Zabranjen je ribolov na salmonidne vrste riba prirodnim mamcima, kao i određenim sredstvima predviđenim Zakonom o slatkovodnom ribarstvu.

Član 17.

U cilju utvrđivanja brojnog i zdravstvenog stanja riba, kao i pribavljanje pojedinih tokova u ribolovnim vodama na ovom području i naučnog istraživanja UGSR Zenica može organizovati izlov ribe mrežom ili agregatom.

III-ZABRANE RIBOLOVA

Član 18.

UGSR „Bistro“ Zenica će u vrijeme mrijesta donijeti zabranu ribolova na ribljim plodištima. Povremene zabrane su u vrijeme mrijesta i poribljavanja. Sve zabrane bit će vidno obilježene.

Član 19.

Na ribolovnim vodama na kojim riblji fond koristi UGSR „Bistro“ Zenica ribolovci će se morati pridržavati lovostaja propisanih Pravilnikom o načinu, alatima i sredstvima kojima se obavlja ribolov. Stalna zabrana i plodište je Ograinska rijeka od ušća u Šerički potok do šuplje stijene uzvodno.

Član 20.

Po ukazanoj potrebi i u određenim slučajevima radi zaštite ribljeg fonda, UGSR «Bistro» Zenica će na osnovu ovog Pravilnika u svom godišnjem Programu unapređenja i zaštite ribljeg fonda određivati privremene zabrane ribolova (kao što su: plodišta za

vrijeme mrijesta riba, ušća rijeka i potoka u Bosnu, kao i mjesta gdje će se vršiti poribljavanje uz vidno obilježavanje zabrana).

IV-CIJENE DOZVOLA

Član 21.

Ribolov na vodama UGSR «Bistro» Zenica reguliše se na osnovu članskih karti izdatih u sjedištu Udruženja. Izdavanje svih vrsta dozvola za obavljanje sportskog ribolova isključivo pravo ima UGSR «Bistro» Zenica.

Cijene dozvola određene su Pravilnikom o sadržaju i obliku obrasca ribolovne dozvole propisanim od strane Federalnog Ministarstva.

UGSR «Bistro» Zenica je dužno da na najprikladniji način obezbijedi izdavanje dozvola za članove i druge korisnike, a iste će u skladu sa Zakonom naručiti u do kraja tekuće za narednu godinu od Sportsko Ribolovnog Saveza FBiH (u daljem tekstu: SRS FBiH).

Član 22.

Dozvole se mogu izdavati samo na posebnim obrascima štampanim od strane SRS FBiH, a propisanih Pravilnikom o obliku i sadržaju obrasca dozvole za obavljanje sportsko – rekreacionog ribolova.

V-OBAVEZE ČLANOVA UGSR „BISTRO“ ZENICA

Član 23.

Članovi UGSR «Bistro» Zenica dužni su da se pri obavljanju sportskog ribolova drugarski i međusobno sportski odnose.

Na zahtjev ribočuvara, organa MUP-a, komisije za zaštitu i unapređenje ribljeg fonda i drugih ovlaštenih lica, lica su dužna da pokažu dozvolu na uvid, te dozvoliti pregled ulova u pojasu od 100 metara od ribolovne vode.

VI-ODŠTETNI CJENOVNIK

Član 24.

Štete koje se počine u ribolovnim vodama bit će naplaćene prema Pravilniku o oštetnom cjenovniku propisanim od strane Federalnog Ministarstva za poljoprivredu, vodoprivredu i šumarstvo Federacije Bosne i Hercegovine.

Član 25.

Ukoliko se vrši zagađivanje vodotoka otpadcima štetnim po riblji fond (ispuštanje u vodotoke otpadne industrijske vode, ispuštanje u vodotoke goriva, maziva, ulja, deterdženta, bacanje u vodotoke ambalaže od hemiskih sredstava za poljoprivredu, kupanje ovaca u vodotocima i tretiranje istih sa šugavunom, plavljenje balvana, bacanje ogranaka i pilote u vodotoke, vađenje šljunka, zamućivanje, pranje automobila u vodotocima, odvratanje vodotoka i drugih radnji štetnih po riblji fond) članovi Ekološke sekcije UGSR «Bistro» Zenica u cilju zaštite voda od različitih vrsta zagađivača, kao i zdravstvene zaštite ribljeg fonda dužni su prijaviti sve gore navedene radnje nadležnim kantonalnim inspeksijskim organima, kao i općinskim (komunalna i poljoprivredna).

Ekološka sekcija UGSR «Bistro» Zenica će izvršiti procjenu napravljene štete i zajedno sa prijavom dostaviti nadležnim inspekcijskim organima.

Član 26.

Štetu koju nanesu ribljem fondu maloljetna lica dužni su nadoknaditi njihovi roditelji ili staraoci.

Član 27.

Ako se šteta ribljem fondu nanosi radnjama iz člana 25. ovog Pravilnika, stalno ili konstantno u pojedinim vremenskim razdobljima, naknada se može plaćati u paušalnom iznosu, čija se visina utvrđuje pismenim ugovorom, sudskim poravnanjem ili na osnovu pravosnažne sudske odluke.

VII-USLOVI ZA VRŠENJE SPORTSKOG RIBOLOVA

Član 28.

Na ribolovnim vodama na kojima pravo upravljanja ima UGSR «Bistro» Zenica nije dozvoljen privredni ribolov ukoliko fizička i pravna lica nisu dobila dozvolu od strane Kantonalnog Ministarstva, na osnovu sprovedenog javnog konkursa u skladu sa odredbama Zakona o slatkovodnom ribarstvu i Zakona o koncesijama.

Sportsko – rekreacionim ribolovom se mogu baviti ribolovci:

1. koji imaju položen ispit za lov riba u sportsko – rekreacionom ribolovu;
2. koji imaju dozvolu za ribolov.

Član 29.

Određuju se minimalne mjere za pojedine vrste riba:

-pastrmka-----	25 cm
-mladica-----	70 cm
-šaran-----	35 cm
-som-----	60 cm
-mren-----	35 cm
-klen-----	20 cm
-plotica-----	15 cm
-škobalj-----	25 cm
-rak kamenjar-----	8 cm

Upravni odbor UGSR «Bistro» Zenica može na pojedinim vodama ili dijelovima rijeka za pojedine vrste riba povećati minimalne mjere.

Član 30.

Lovostaj na salmonidne vrste riba:

-pastrmka (potočna)	od 1.oktobra do 28. februara
-pastrmka (kaliforniska).....	od 1.februara do 31. maja
-mladica-----	od 1. februara do 31. maja

Upravni odbor UGSR «Bistro» Zenica može na pojedinim vodama ili pritokama produžiti lovostaj za pojedine vrste riba, a naručito kad se radi o posebnoj zaštiti nakon izvršenog poribljavanja.

Lovostaj na ciprinidne vrste riba:

-šaran----- od 1. aprila do 31. maja
-som----- od 01. aprila do 15. juna
-mrena----- od 1. aprila do 15. maja
-plotica----- od 15. aprila do 30. juna
-škobalj----- od 1. aprila do 15. maja
-klen----- od 15. aprila do 30. juna
-rak kamenjar----- od 1. novembra do 15. maja

Član 31.

Zabranjeno je vršenje ribolova na pojedinim vodama ili njihovim dijelovima koje odlukom nadležnog Kantonalnog Ministarstva za poljoprivredu, šumarstvo i vodoprivredu budu određene. Prijedlog o donošenju stalnih ili privremenih zabrana ribolova donosi Upravni odbor UGSR «Bistro» Zenica.

Na isti način se postupa i kod ukidanja zabrana na pojedinim vodama ili njihovim dijelovima.

VIII-DOZVOLJEN DNEVNI ULOV

Član 32.

Na ribolovnom području UGSR «Bistro» Zenica dozvoljeno je uloviti:

- jednu mlacu, a najviše tri komada godišnje;
- pet pastrmki dnevno;
- četiri soma, smuđa i šarana dnevno;
- deset škobalja, plotica, deverika i klena dnevno;

U slučaju ulova raznih riba iz tačke 3. stavka 1. ovog članka maksimalan broj je uvijek tri ribe, iz tačke 4. maksimalan broj je uvijek četiri, a iz tačke 5. maksimalan broj je uvijek deset.

IX-ZAŠTITA RIBLJEG FONDA

Član 33.

Zaštitu ribolovne zone Udruženje će vršiti preko ribočuvarske službe i komisije za zaštitu i unapređenje ribljevog fonda (komisija će biti iz redova članova Udruženja), kao i preko članova Udruženja.

Pravo i dužnost ovlaštenog lica odnosno čuvara ribljevog fonda, odnosno člana komisije za zaštitu i unapređenje ribljevog fonda je da kontroliše da li se ribolov vrši u skladu sa Zakonom o slatkovodnom ribarstvu, Ribarskom osnovom, Pravilnikom o korištenju ribljevog fonda i drugim pravilnicima i odlukama Upravnog odbora Udruženja.

Prilikom kontrole ribolova ribočuvari i članovi komisije za zaštitu i unapređenje ribljevog fonda su dužni da se pridržavaju člana 41. Zakona o slatkovodnom ribarstvu.

Član 34.

Lica iz predhodnog stava su dužna da vode dnevnik rada u koji unose ribolovnu vodu koju su obišli, imena lica koja su kontrolisali, kao i ostale podatke o izvršenim radnjama i zapažanjima.

Ribočuvar je dužan da vrši svakodnevnu kontrolu cijele ribolovne zone, a članovi komisije za zaštitu i unapređenje ribljeg fonda će imati svoj reon kojeg će redovno obilaziti.

Ovlaštena lica su dužna da svaku promjenu na vodi registruje, a u slučaju većih trovanja i drugih štetnih posljedica dužni su odmah obavijestiti Upravni odbor Udruženja.

Član 35.

UGSR «Bistro» Zenica će pitanje čuvarske službe i komisije za zaštitu i unapređenje ribljeg fonda regulisati posebnim pravilnikom u kome će biti tačno nabrojane dužnosti i obaveze čuvara i članova komisije, kao što su: praćenje, ispuštanja štetnih otpadnih voda u vodotoke od zagađivača, vađenje šljunka, bacanje otpadaka od strane pravnih i fizičkih lica koja čine štetu ribljem fondu i druge aktivnosti predviđene Pravilnikom o radu čuvarske službe.

Interni Pravilnik o radu ribočuvarske službe će biti usklađen sa propisima Pravilnika o organizaciji i radu ribočuvarske službe, obliku i sadržaju obrasca legitimacije i značke ribočuvara propisanim od strane Federalnog Ministarstva.

X-NAČIN I USLOVI KORIŠTENJA SREDSTAVA ZA ŠTETU PRIČINJENU RIBLJEM FONDU

Član 36.

Pričinjena šteta ribljem fondu će biti naplaćena u skladu sa Pravilnikom o oštetnom cjenovniku u ribarstvu propisanim od strane Federalnog Ministarstva.

Sve štete pričinjene ribljem fondu i ostale naknade unose se u Fond za unapređenje i zaštitu ribljeg fonda UGSR «Bistro» Zenica, a iste će se upotrijebiti za poribljavanje voda.

Član 37.

Ovim Pravilnikom je Upravni odbor UGSR «Bistro» Zenica ovlašten da može donijeti posebnu Odluku o nagrađivanju članova zaslužnih na očuvanju flore i faune na ribolovnoj zoni UGSR «Bistro» Zenica.

XI-PRELAZNE I ZAVRŠNE ODREDBE

Član 38.

Za tumačenje odredbi ovog Pravilnika donesenog na osnovu Zakona o slatkovodnom ribarstvu nadležan je Upravni odbor UGSR «Bistro» Zenica.

**UPRAVNI ODBOR
UGSR „BISTRO“ ZENICA**